

Pemberian penutup mulut dan hidung percuma, terserah kepada MKN - Nanta

Bername | Diterbitkan pada Mac 22, 2020 16:37 MYT



Mengenai barangan keperluan harian Nanta berkata, setakat ini pemantauan pihak kementerian mendapati bekalan di seluruh negara adalah mencukupi. - Gambar Facebook

PUTRAJAYA: Terserah kepada Majlis Keselamatan Negara (MKN) untuk membuat keputusan mengenai cadangan pemberian penutup mulut dan hidung secara percuma, terutamanya di kawasan-kawasan berisiko COVID-19, kata Menteri Perdagangan Dalam Negeri dan Hal Ehwal Pengguna Datuk Alexander Nanta Linggi.

"Ada diperbincangkan, tetapi saya tidak boleh memberi maklumat tentang itu. Tunggulah keputusan nanti, memang kerajaan prihatin kepada rakyat," katanya ketika ditanya sama ada kerajaan bercadang mengedarkan penutup mulut dan hidung secara percuma kepada rakyat seperti yang dilaksanakan di beberapa kawasan berisiko di Thailand oleh unit kesihatan negara itu.

Nanta yang ditemui semasa membuat tinjauan bekalan barangan keperluan semasa di sebuah pasar raya di sini berkata, kerajaan sedang mempergiatkan usaha memastikan bekalan topeng muka di dalam negara mencukupi, termasuk mendapatkan bekalan dari luar negara dan melarang eksport ke luar negara.

"Jadi kita tunggu beberapa hari lagi barangan itu akan masuk. Banyak juga pengimport hendak bawa masuk, jadi usaha-usaha ini kami yakin akan dapat mengatasi masalah kekurangan penutup mulut dan hidung," katanya.

Ditanya sama ada kerajaan akan menghadkan pembelian penutup mulut dan hidung bagi setiap individu apabila bekalan masuk kelak, Nanta berkata, ketika ini tiada cadangan untuk melaksanakan perkara itu, namun beliau menasihatkan orang ramai agar membeli mengikut keperluan.

"Belum sampai nak hadkan pembelian, tetapi kita rayu kepada semua supaya membeli secara berhemah, fikirkan orang lain kalau kita beli terlalu banyak untuk kita sendiri, itu tunjukkan kita tidak prihatin terhadap orang lain," katanya.

Mengenai barangan keperluan harian Nanta berkata, setakat ini pemantauan pihak kementerian mendapati bekalan di seluruh negara adalah mencukupi, walaupun terdapat aktiviti pembelian panik berikutan pelaksanaan Perintah Kawalan Pergerakan.

"Ada di beberapa tempat berlaku pembelian panik, tetapi tidak sampai kepada tahap yang terlalu teruk dan tidak berkekalan. Mungkin pengguna di kawasan berkenaan membeli berlebihan, tetapi tidak sampai ke tahap merisaukan," katanya.

Menurut beliau, kementerian akan terus memantau bekalan dan harga barangan keperluan, sepanjang tempoh pelaksanaan Perintah Kawalan Pergerakan ini.

-- BERNAMA

<http://www.astroawani.com/berita-malaysia/pemberian-penutup-mulut-dan-hidung-percuma-terserah-kepada-mkn-nanta-234766>